

T9297/3122b

68

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JUN 2 1941



新編古今事文類聚新集卷之十九

哈佛大學漢和圖書館珍藏印

南江

富大用

時可

編

金陵

唐富春

子和

刊

諸院部

宣徽院

左右宣徽使

歷代沿革

唐

置宣徽使始以宦者為之天祐元年留宣徽南北

院等九使餘並停二年廢宣徽南北院凡有公事並於中書

論詔梁後以王殷為宣徽使省南北院使而有副使後唐復

南北院使省副使晉漢周皆因之宋舊制二使通掌院事共

院異廳止用南院印元置宣徽院有左宣徽使又有右宣

徽使又有同知宣徽院事同簽書宣徽院事宣徽判官掌朝



會燕享凡殿庭禮數管轄閣門橫班諸司

古今事實

始領宣徽

宋開寶九年以潘美依前山南東道節度使充宣徽北院使節度領宣徽自此始又以樞密副使楚昭輔權宣徽南院使以右衛大將軍判三司王仁瞻權宣徽北院使

出為節度

至道元年出宣徽北院使知樞密院柴禹鎮為鎮寧軍節度使太宗謂之曰舊制自宣徽出不過防禦使朕今委爾節旄亦可謂優恩也

用文武臣

至和元年趙抃言近非次除宣徽使節度使頗為煩數今後文臣須曾歷中書樞密院任用加之德望為人推服武臣曾經邊鄙建立功業者方許除拜兼宣徽使元額只是二員至於使相之任體貌尤重更當慎惜

置編修官

熙寧九年五月宣徽北院使王拱辰言本院前後所降宣劄條例文字及逐旋聖旨指揮不可遺墜乞行編修所貴朝廷故事永久可備檢用從之六月壁著作佐郎何洵直充編修官就本院置局十年八月編成條例二十五冊上之

待以空宅

夏鄭公為宣徽北院使自河中府徙判蔡州道經許昌時李邕



郵爲守乃徒居他所空使宅以待之夏公以爲知體

徑以入朝

景德四年十二月承天節百官上壽於崇德殿宣徽使當宣答時知樞密院王欽若權宣徽使事欽若在病假知樞密院陳堯叟復以故不入宰相議以叅知政事權宣答真宗曰宣徽使三司使皆不坐可令丁謂攝事是日欽若徑入朝謂雖承勅不復攝事

客省使 引進使附

**歷代沿革** **唐**開元中始置諸使其後增置**宋**內定客省使至閣門使謂之橫班初以檢校官爲之嘉祐三年詔客省引進各置使一員副使六員內客省使凡崇政殿受朝則升東階侍

立掌四方進奉及四夷朝貢牧伯朝覲酒饌饗餼宰相近臣禁衛將校節儀諸州進奉使賜物回詔之事引進使掌文武官正謝辭國忌賜香諸道章表等事**元**因之置客省使副使各一人又置引進使副使各一人

**古今事實**

謂之館主

宋永初置南北賓客館主四方賓客之事因改爲四方館舊儀於通事舍人中以宿長一人總知館事謂之館主凡四方貢納及章表皆受之類要

隸於臺察

紹興三年詔客省四方館並隸臺察



東西上閣門使

歷代沿革 **五代**唐天祐二年勅東上西上閣門制置各別至於常事則以東上居先或大忌進名遂用西閣為便 **宋**橫班有東上閣門使西上閣門使凡取稟旨命供奉乘輿朝會游宴及贊導三公群臣蕃國朝見辭謝糾彈失儀之事使副專之政和官制橫班副使之名改為大夫而其職任則命內外官知焉其後所除總名知閣門事仍兼客省四方館之職紹興五年詔左武大夫以上並稱知閣門事若官未至右武大夫者即稱同知同兼序在閣門之下即副使也 **元**置東上閣門使二人副使二人西上閣門使二人副使二人又有通事舍人承奉班都知內丞奉班押等員

群書要語既宗三揖之儀爰設九賓之禮 張鷟集內朝之使若

朱華二閣贊相上下時為榮近 政和制上閣之闈 同上思得戎

班之後長吾賓贊之寮其服端闈統司謁者肅等威於表著之

位傳臚句於陛簾之間 龍溪行俞隨等制主禁闈之謁 胡文恭

行向傳範制 曲阜制練習朝章 惟朱華之上閣當太微之法宮

置副介之名用承諸使 胡文恭行馬懷德制

**古今事實**

謂之館老

咸平四年故事閣門長一人判四方館謂之館老 長編又續通

典以為唐故事

謂之喚仗



不承五代之弊文德殿東西有上閣門而無上閣按唐宣政殿門之中朝也定為正衙紫宸直其北是謂上閣蓋自晉太極有東西閣天子間以聽政閣之名起於此方唐盛時立仗於宣政天子坐紫宸而金吾殿中細仗自東西閣門入謂之喚仗今文德殿唐宣政正衙也而垂拱直其北紫宸乃在東偏文德殿東西但有上閣二門未審以何處為上閣直參攷典故正上閣之名復有唐盛事

馬文昌雜錄

### 儕輩皆聳

宋太祖朝客省使張保績為衛尉卿判客省閣門事保績在閣門前後四十年宣贊詞令聽者皆聳儕輩推其能故特寵之

長編

### 宦官一沮

宋仁宗時內殿崇班錢晦累遷閣門使宦官王守忠領節度觀察留後牒閣門定朝位燕坐晦田對言天子大朝令宦官坐殿上必為四夷所笑守忠又欲以神服進酒晦以為不可禮官議與晦同而言事官亦言守忠由是一沮

### 東上西閣

唐天祐二年勅東上西上閣門制置各別至於常事則以東上居先或大忌進名遂用西閣為便頃緣閣豎擅權而陰陽叙立不思南面但啓西門詳其稱禮似爽規儀自今定依舊制

續通典

### 橫行知閣

紹興元年詔主管閣門朱錢孫轉橫行一官落權字上曰錢孫乃藩邸內知客稍習閣門儀注而法非權行不許知閣門故與



轉橫行一官 中興會要

通事舍人

歷代沿革故事閣門無通事舍人而通事舍人 **唐**制自隸中

書省如抽赴閣門並稱閣門祇候其後直授閣門通事舍人

非舊制也天禧中去閣門二字政和六年詔以閣門通事舍

人名行鄙俗可改為宣贊舍人 **元**閣門置通事舍人二員

**群書要語**有大行人小行人 周禮 漢謁者隨行 相導通奏之

節宣揚拜起之儀引而贊之不聞失禮 白集李晟制 辨色而朝

百辟輯瑞以會萬方正錯立族談之儀宣注意登庸之命鏘鏘

齊進退以時名為侍臣以贊導吾左右者通事舍人之任也

盧均制 舊典通事本隸西臺近制建官則領朱閣非善音

咄有姿範者不得與選 胡文 雅贊制 典謁天墀之華 **玉**

威制 特陞宣納之名 同上 寘 職於上閣而轉清 曹修制 再

隸朱華之閣又侍赤塗之墀 柴 範制 特陞贊於殿中 同上 典

司中謁 李繼明制 參典中涓之謁 王文思制 宣傳辭令相導儀

矩閑於其事必得其人 曲阜行高世賞制 上閣贊導之官武列

之高選 賈佑制 宸闈二閣處天下戶班之後而掌賓贊之職者

其選尤高 龍溪除其暉制

**古今事實** 詞令進止

唐崔崇禮以節義自將武德中官通事舍人善詞令進止觀者

皆竦 職林



周旋吐納

孫處約曰得為通事舍人在殿中周旋吐納可也

熟於宣導

晉天福二年檢校兵部尚書陳瓚守衛尉卿兼通事舍判館事以其熟於宣導故雖位三品猶總館事

書其忠信

宋仁宗時李惟賢為閣門通事舍人在閣門習朝廷儀制數奏事稱旨仁宗嘗書忠信李惟賢五字賜之後又賜以李惟賢忠孝勤謹七字

尚衣局

歷代沿革周禮有司服中士二人掌王之吉凶衣服辨其名物

其用也國有尚衣尚冠之職漢少府屬官有御府令

永掌供御服後漢有掌官者典官婢作中衣服及補浣之事

魏因之晉屬光祿勳宋大明中改尚方曰左右御府各置令

丞二人後廢帝初初省御府置中署其後又置至梁高祖省

文帝置梁陳無御府其職隸左尚方後魏有掌服郎北齊門

下省統主衣局都統各二人後周有司服上士二人中士二

人隋門下省有御府局監二人大業三年分屬門下省其後

又改為尚衣局有直長四人主衣十二人唐因之龍朔二年

改為奉冕大夫咸亨復舊又有尚衣奉御掌供天子衣服詳

其制度辨其名數而供其進御直長為之貳宋初置內衣庫

使副使後去內字元置尚衣局亦有使副使各一人



造衮冕依式

唐間立德隋殿內少監毘之子也毘初以藝知名立德與弟立本早傳家業武德中累除尚衣奉御立德所造衮冕衣裘辭六服并署輿傘扇威儀典式時人稱之

儀鸞局

歷代沿革

置營幕使後置同知院使

梁開平初改儀鸞

使宋置儀鸞使副使置儀鸞局有使副使各一人

收支局

歷代沿革

始置都監一人同監二人

尚食局

代沿革周禮有饎夫內饎食醫中士掌和王之六食六飯六

饎百羞百醬八珍之饎秦置六尚尚有尚食漢因之後遂省至

北齊門下省統六局食局有典御二人丞監各四人又有

集書省統三局有中書食局後周有內膳上士二人中士四

人允進食必先嘗之又自主食主膳至隋開皇初門下省統

尚食局有典御二人直省四人食醫四人大業三年分屬殿

內改典御為奉御自各一人唐龍朔二年改為奉膳大夫咸

亨復舊掌供天子之常膳隨四時之禁適五味之宜五代梁

有尚食使副使置尚食局有使副使各一人

生料庫

歷代沿革

始置生料庫有都監同監又有收支都監同監等員



尚藥局

**歷代沿革** 自**陳****梁**後**魏**已往皆太醫兼其職**北齊**門下省統尚藥局有典御二人侍御師四人尚藥監四人總御藥之事又集書省統三局有中尚藥局典御丞各二人中謁者僕射二人總知中宮醫藥之事**隋**門下省統尚藥局置典御侍御醫直長醫師大業三年分屬殿內改為奉御**唐**因之龍朔二年改為奉醫大夫咸淳復舊**宋**舊有香藥庫置使**元**置尚藥局有使副使及都監各一人

果子庫

**歷代沿革** **元**始置果子庫有都監同監各一人  
內藏庫

**歷代沿革** **宋**太平興國初置庫及使名**元**內藏庫有使副使又有隨庫都監同監掌內府珍寶財物

太醫院

**歷代沿革** **周**有醫師上士下士**秦漢**少府屬有太醫令丞**後漢**又有藥丞一人**魏**因之**晉**宗正屬官有太醫令丞過江省宗正而太醫以給門下省**宋**齊太醫令丞隸侍中**梁**隸門下省**陳**因之**後魏**有太醫博士助教**後周**又有太醫下大夫小醫上士**隋**有太醫令丞又有主藥醫師藥園師呪禁博士煬帝又置醫監醫正**唐**有太醫署令丞令掌醫療之法丞為之貳**宋**亦置太醫令丞熙寧八年又置太醫局別置提舉一員判局二員管勾一員**元**置太醫院有使副使判官各一員掌醫



療之法

**群書要語**若藥弗與眩厥疾弗瘳書在膏之上膏之下醫至曰

疾不可為也左無妄之藥不可試也易動不肆勤靜不宴逸有

疾歸天醫無能恤太上防疾其次萌芽腠理不蠲骨髓柰何崔

寔太醫令歲侍醫禁庭曲阜行藩播等制和六飲六膳以會其

時察五色五聲以知其變元集方同端制

御藥院

**歷代沿革****周**禮有食醫掌和王之六食六飲六膳百羞百醬八

珍之齊周制不用宦問**宋**御藥院主管四人以入內內侍充

掌按驗方書修合藥劑以侍進御及供奉禁中之用凡藥必

一品掌而後進大祭祀朝會燕享行幸則扶持左右饋進膳羞

亦知之凡遷轉之序初除聽喚以進左右也自聽喚中選任

主管龍圖天章閣謂之閣長次遷管後死次遷管內東門謂

之門司次遷御藥謂之藥局自此為侍從由御藥擢押班即

除昭宣使

**群書要語**屢辭藥藏之魏文恭行王從禮制擢升御府曲阜制

教坊

**歷代沿革****周**大司樂中大夫樂師下大夫四人掌成均之法以

樂舞教國子又有太師下大夫二人掌六律六呂以合陰陽

之聲**秦漢**奉常屬官有太樂令丞又少府屬官有樂府令丞

**後漢**太常樂令一人**魏**復為太樂令丞**晉**元帝并太樂於鼓

吹**宋**太常有太樂令丞**齊**因之**梁**太常屬官有太樂令又別



領清商丞太樂有庫丞陳因之後魏太和十五年置太樂官  
有太樂博士北齊太常寺有太樂令丞後周有司樂上士中  
士隋太常寺統太樂令丞二人唐因之武德後置內教坊于  
禁中如意元年改曰雲韶府以中官為使開元二年又置內  
教坊于蓬萊宮側有音聲博士京師置左右教坊掌俳優雜  
劇自是不隸太常以中官為教坊使宋樂府隸太常寺元置  
教坊有使副使判官各一人

宮闈局

歷代沿革唐內侍省有五局官屬一曰掖庭局主宮嬪簿二曰  
宮闈局扈門闈三曰奚官局治宮中疾病生歿四曰內僕局  
主宮帳燈燭五曰內府局主中藏給納局有令丞各二人皆

宦者為之宮闈局常侍奉宮闈出入管鑰宋不置元仍唐舊  
亦置宮闈局有使副使各一人又有隨殿位都監同監之員  
宮苑司

歷代沿革五代梁有宮苑使副使宋因之元置宮苑司有令丞  
各一人

內侍局

歷代沿革夏商周禮有閹人寺人內豎皆其職也春秋  
有豎刀晉有寺人披秦有寺人秦漢加官有中常侍參用七  
人皆銀瑠左貂給事殿省後漢中常侍贊導內事顧問應對  
永平中定員四人小黃門十人漢舊儀曰中常侍得出入卧  
內舉法省中明帝以後改以金瑠右貂太熹太后稱制乃以



闈人為常侍小黃門通命兩宮自此悉用闈人不調他事

**漢**有大長秋初漢景帝改將作為大長秋又置內侍長四人

掌顧問拾遺應對此齊有中侍中省隋曰內侍省置內侍二

人內常侍二人內侍即舊長秋而常侍即舊中常侍煬帝改

為長秋監唐復為內侍省龍朔改省為監光宅為司宮臺神

龍復號內侍省官有內侍四內常侍六初太宗定制內侍不

立三品官以內侍為之長階第四不任以事惟闔門守禦廷

內掃除稟食而已開元天寶中始拜三品將軍列戟于門宋

有內中高品班院淳化五年改入內內班院又改入內黃門

班院又改內侍省入內內侍班院景德三年其東門取素司

可併隸內東門司餘入內都知司內東門都知司內侍省入

內內侍班院可立為八內內侍省以諸司隸之宋初有內班

院淳化五年八月改內班為黃門九月改黃門為內侍黃門

院為內侍省入內內侍省與內侍省號為前後省而入內省

比前者尤為親近通侍禁中役服褻近者隸入內內侍省拱

侍殿中備灑掃之職役使雜品者隸內侍省入內內侍省號

北司內侍省號南班入內內侍省有都都知副都知押

班內東朝供奉官西頭供奉內官侍殿頭內侍高品內侍高

班內侍黃門內侍省有左班都知副都知右班都知副都知

押班內東頭供奉官內西頭供奉官內侍殿頭內侍高品內

侍高班內侍黃門自供奉官至黃門以一百八十人為定員

凡內侍初補曰小黃門經恩遷補則為內侍黃門後省官闕

事類彙編卷之十九



則以前省官補押班次遷副都知次遷都知遂為內臣之極品熙寧中入內內侍省內侍省都知押班逐省各以轉入先後相壓永為定式其官稱則有內客省使延福宮使宣慶使宣政使昭宣使宋初所置元豐門議改官制張誠一欲易都知押班之名置殿中監以易內侍省既而宰執進呈神宗曰祖宗為此名蓋有深意豈可輕哉以是且仍舊制至政和二年始遂改焉元置內侍局有令二人丞三人局長二人

群書要語御史僕從罔匪正人書予曰有奔走詩手握王爵口

銜天憲後漢宦官傳論超登宮卿之位職參天機並同上服勞

宮省龍溪除游回制彌光貂省之任胡文恭行允制聯職內

曲阜除職安制

古今事實

不除節度

皇祐間王守中不除節度觀察使而止給其俸何剡抗疏爭辯以為不可其後孫托亦以節度使所以尊寵將帥專置軍事安危成敗一以係焉豈宜中官得加其任

餘皆奉祀

祖宗成法內侍為丞宣觀察者帶橫行雖有一二正任皆老疾歷年既多丐祀祿然後予之中興以來此選尤遴以高孝兩朝言之其為正任承宣使者不過數人不除節度

宦有四星

天文有宦者四星在帝座之西



五代宦官論

歐陽修

自古宦者亂人之國其源深於女禍女色而已宦者之害非一端也蓋其用事也近而習其為心也專而忍能以小善中人之意小信固人之心使人主必信而親之待其已信然後懼以禍福而把持之雖有忠臣碩士列於朝廷而人主以為去已踈遠不若起居飲食前後左右之親為可恃也故前後左右者日益親則忠臣碩士日益踈而把持者日益牢安危出其喜怒禍福伏於帷闥則向之所謂可恃者乃所以為患也患已深而覺之欲其踈遠之臣圖左右之親近緩之則養禍而益深急之則挾

人主以為質雖有聖智不能與謀謀之而不可為為之而不可成至其成則俱傷而兩敗故其大者亡國其次亡身而使奸豪得借以為資而起至挾其種類盡殺以快天下之心而後已前史所載宦官之禍常如此者非一世也夫為人主者非欲養禍於內而踈忠臣碩士於外蓋其漸積而勢使之然也夫女色之惑不幸而不悟則禍斯及矣使其一悟粹而去之可也宦者之為禍雖欲悔悟而勢有不可得而去也唐昭宗是已故曰深於女禍者謂此也可不戒哉昭宗信狎宦者由是有東宮之幽既出而與崔胤圖之胤為宰相顧力不足為乃召兵於梁梁兵且至而宦者挾天子走之岐梁兵圍之二年昭宗既出而唐亡矣初昭宗之出也梁王悉誅唐宦者第五可範等七百餘人其在



外者悉詔天下捕殺之而宦官多爲諸鎮所藏匿而不殺及莊宗立詔天下訪求故唐時宦者悉送京師宦者遂復用事以至於亡此何異求已覆之車躬駕而復其轍也可爲悲矣莊宗未滅梁時張承業已歿其後居翰雖爲樞使而不用事有宣徽使馬紹宏者頗見信用然誣殺大臣贖貨賂專威福以取怨於天下者左右狎昵黃門內養之徒也是時明宗自鎮州入覲奉朝請莊宗頗疑有異志陰遣紹宏候其動靜紹宏反以情告明宗明宗自魏而返天下皆知禍起於魏孰知其啓明宗之二心者皆紹宏始也郭崇韜已破蜀莊宗信宦者言而疑之然崇韜之歿莊宗不知皆宦者爲之也當此時唐之精兵皆在蜀使崇韜不歿明宗入洛豈無西顧之患其能取唐而代之耶明宗入立

又詔天下悉捕宦者而殺之其他至太原者七十餘人悉殺之都亭驛明宗晚而多病王淑妃專內以干政宦者孟漢瓊因以用事秦王入視明宗疾已革旣出而聞苦聲以謂帝崩矣乃謀以兵入宮者懼不得立也大臣朱宏昭等方圖其事議未決漢瓊遽入見明宗言秦王反卽以兵誅之陷秦王大惡而明宗以此飲恨而終後愍帝奔于衛州而漢瓊迎廢帝于路廢帝惡而殺之嗚呼人情處安樂自非聖哲不能久而無驕怠宦女之禍非一日必伺人之驕怠而浸入之明宗非佚君而猶若此者蓋其在位差久也其爲大害畧可見矣獨承業之論偉然可愛而居翰更一字以活千人於斯二人有取焉取其善而戒其惡所謂愛而知其惡憎而知其善也



論宦官

范祖禹

臣聞書曰與治同道罔不興與亂同事罔不亡漢有天下四百年唐有天下三百年及其亡也皆由宦者相去五百餘年如循一軌蓋與亂同事未有不亡者也漢自元帝任用石顯委以政事殺蕭望之周堪而廢劉向等漢之基業壞於元帝東漢鄧后臨朝中官用事手握王爵口銜天憲順帝以後五侯專朝桓帝靈帝之時十常侍擅天下子弟親黨割剥百姓毒流四海附之者寵及三族違之者滅及五宗大考黨獄夷戮天下名士於是黃巾賊起朝野崩離及袁紹誅宦官獻帝奔播困餒而曹操因之以篡漢唐自明皇使高力士決省章奏宦官始盛李林甫楊國忠等皆因力士以進唐世之禍基於開元肅宗任李輔國末年寢疾輔國以兵劫遷明皇於西內殺張皇后及二王明皇以幽萌肅宗以駭沒貴為天子上不保其父中不保其身下不保其妻子由用輔國一人而已代宗用程元振功臣畏讒吐蕃寇陷京師播遷于陝德宗用宦官分領神策禁兵其後天子由其所立唐室終以此亡憲宗服金丹躁忿為陳洪進所弑敬宗為劉克明所弑文宗欲言憲宗之賊謀泄仇士良殺四宰相及朝臣滅其族流血成渠朝廷半空文宗憂憤以至于沒武宗以後皆由宦官所立僖宗呼田令孜為父天下大亂黃巢賊起播遷知之必不為也臣侍經筵八年日望一日歲望一歲期陛下為令德之主惟恐有纖毫之失故不避違拂聖意數進苦切之言陛下每留睿聽以臣愚直見知臣亦不量微力切以獻納自任



事類彙編卷之十九  
今茲事體實係朝政污隆人情去就臣義均休戚榮辱不忍嘿  
嘿坐視敢冒萬死而獻其忠惟陛下裁察

新編古今事文類聚新集卷之二十

南江 富大用 時可 編  
金陵 唐富春 子和 刊

諸院部

翰林院

歷代沿革 唐翰林故事翰林院左右銀臺門內麟德殿西重廊

之後益天下藝能伎術見召者之所處學士院開元二十六  
年置在翰林院之南別戶向東前代即無舊名貞觀中虞世  
南等以弘文館學士會于禁中內叅謀猷號十八學士其後  
永徽中黃門侍郎顧琮有麗正之稱開元初中書令張說又  
有集賢之目未有典司玄宗以四奧大同萬樞委積詔勅文



誥悉由中書或慮當劇而不周務速而時滯宜有偏掌由是始選朝官有詞藝學識者入居翰林供奉別旨然亦未定名制至二十六年始以翰林供奉改稱學士由是遂別建學士院俾掌內命至德以後軍國務殷其入直者並以文詞共掌詔敕自此北翰林院始兼學士之名其後又置東翰林院於金鑾殿之西隨上所在而遷取其便近**五代**晉高祖天福五年詔翰林學士院公事並歸中書舍人少年開運元年勅翰林學士與中書舍人分為兩制各置六員**宋**學士院在樞密宣徽院之北表裏深嚴宥谷又謂之北扉在浴堂之南便於應詔至和三年詔學士院從官兩員掌專一管勾編錄國朝以來所撰制詔文字

**翰林學士院**置翰林學士承旨及翰林學士侍讀侍講一學士有真字

翰林待制翰林修撰應奉翰林文字等官掌制撰詞命之事凡應奉文字自翰林學士承旨至直學士銜內帶知制詔應奉銜內帶同知制詔

群書要語翰林樞機宥密之地 李肇翰林志 清華之地 太宗賜

蘇易簡御札 北院之置尤為切近左接寢殿右瞻彤樓晨趨鎖

闈夕宿嚴衛密之至也 韋執誼翰林故事 鏐得御廐之駿出

入有內司之導豐殺絜饌取給大官衾禡服御資於中庫恩之

厚也 同上 備待顧問辯駁是非典持練牘受遣群務凡一世得

失動為藏否職之重也 並同上 若乃職任之清切曹局之嚴凝

禮遇優渥賜與繁縟 金坡故事 發揮大猷藻繪上命隻簡片削

可以動乎人神 翰林故事 居翰死者皆謂凌玉清遡紫霄豈止



於登瀛洲哉李肇志玉署之設密邇紫闥每夜漏既上宮鑰並

入有大號令大除拜邊境急奏惟天子與學士知之雖戴鵝之

士充滿于廬典司翰墨一人而已居是職者豈不貴重乎金坡

遺事此新大壯敞金馬之直廬同上矧惟翰墨之司專掌絲綸

之命翰林志後唐學士劉响奏

**詩句**晨趨紫禁中夕待金門詔李白上君白玉堂倚君金華省

杜君王曉坐金鑾殿只待相如草詔來李商隱銀花懸院榜神

撼引風鈴李德裕月上花塼簾捲後柳遮鈴索雨初晴錢若水

玉堂作詔出紫泥封去潤朝回蓮燭賜來香楊微之玉堂作謾

道玉為堂玉堂今夜長張洙詩

### 移殿鑾坡

唐制駕在大內則明福門外置學士院駕在興慶宮則金明門

內置院德宗移院於金鑾坡

召見金鑾

唐元宗召李白見於金鑾殿降輦步迎如見園綺李白傳

並用白麻

唐故事中書用黃白二麻為綸命重輕之辯其後翰林學士專

掌內命選用益重中書所出獨得用黃麻其白麻皆在北院自

非國之重事拜授將相德音赦宥不得由於斯翰林志**又**元和

初凡赦書德音立后建儲大討誅拜免三公宰相命將日制書

並用白麻不用印會要



皆用菱紙

李德裕浸紅點書詔皆用菱汁持紙海錄碎事

詔賜金印

晉開運中賜學士院書詔金印一面翰林志

親擇賜笏

李絳初入院憲宗親擇笏以賜之

居一品上

唐故事凡內宴班居一品之上

謂一條冰

陳彭年兼數職皆文翰清祕之目人見其官衙謂為一條冰事畧

時號內相

陸贄入翰林年尚少以材幸天子常以輩行呼不以名雖外有

宰相主大議而贄常居中參裁可否時號內相白氏六帖

宣諭門客

唐武后朝會宣諭卿等是我門客李衛公詩話

論當世事

李白召見金鑾殿論當世事奏頌一篇有詔供奉翰林

謫天上仙

李白以翰林斥去放浪江湖嘗夜月乘舟采石達金陵白衣宮

錦袍於舟中顧瞻笑傲旁若無人初賀知章見白賞之曰此天

上謫仙人也

號稱六絕



唐李邕號翰林六絕謂文章書翰等六事過人 唐志

號試五題

長興元年翰林學士劉昫奏本院舊例學士入院除中書舍人不試餘皆試麻制答蕃書批答各一道詩賦各一首號曰試五題 續通典

不受謝金

寶曆元年路隨為翰林學士有以金帛謝除制者必叱而去之曰吾以公事接私財邪終無所納 續通典

何以潤筆

草麻潤筆自唐有之鄭譯自隆州刺史復爵李德林作詔高宗戲之曰筆頭乾譯曰出為方伯杖策而歸不得一錢何以潤筆

書玉堂署

宋太宗以玉堂之設其來尚矣但虛傳其號而無正名乃於紅綃上御書飛白四字題曰玉堂之署以賜蘇易簡公捧歸私第以慶耀其親擇日懸掛仍具扁鐫于玉堂之上有待詔院吏而下成列賀于庭公曰自唐置學士來幾二百年今日方知貴矣即日詔宰輔暨兩制詞臣就院勅設宴帳仍各賦長韻詩以紀其事其詩目曰禁林讌會集

榜揭文堂

政和五年御書揭文堂榜賜學士院 續會要

賜青團扇

唐翰林初選者試制書批答二首內庫給青綺被紫絲履之類



端午賜青團扇 並翰林志

賜錦長襖

學士舊規十月賜錦長襖宋初以來賜翠毛錦太宗改賜黃盤

鷓鴣錦 金坡遺事

給綺綾被

允初遷者本院賜宴營幕使宿設帳幄尚食使供珍饌酒坊供

美酒是為勅設宴賜衣內殿給青綺綾被青綾單帕紫絲履白

布手巾之類 蘇續志

賜紅錦袍

十月朔舊賜對衣紅錦袍淳化二年代以細花盤鷓鴣錦袍下丞

相一等 蘇續志

號槐廳

學士院第三廳閣子有一巨槐素號槐廳舊傳居此閣者多至

入相 蘇易簡續志

設視草臺

故事堂中設視草臺每草制則具衣冠據臺而坐今但存空臺

筆談

但用咨報

百司申中書皆用狀惟學士院用咨報其實劄子不出名但當

直學士一人押字而已謂之咨報此唐學士舊規也 歸田錄

不草詞頭

胡宿知制誥內都知郭懷敏勢傾中外出為和州都監召復故



職宿選詞頭不草制事畧

贊之時望

太祖曰郭贊南府門人朕命掌誥制書一出人或哂之益其素乏時望朕亦為之靦顏亦終不令入翰林也長編

果失躁競

范杲數致書宰相求入翰林於是獻玉堂記請備其職上惡其躁競不使居內同上

親近冕旒

雍熙二年敕曰兩制詞臣公朝精選典司誥命親近冕旒會要

同在鰲禁

三公白賈公黃中皆先造鰲儒同在鰲禁筆談

隻日降麻

翰林所著撰拜免公王將相妃主日制賞賜恩宥日赦書日德音處分事日敕日御札五品以上日詔六品以下日敕批群臣表日批答獎勳勞日獎諭賜外國書日蕃書醮日青詞密詞釋日齋文教坊致語日白話土木興建日上梁文宣賜日口宣此外有祝文碑文神道碑樂章詩頌春帖子之類撰述進入遇有除拜以隻日鎖院隻日降麻翰林志

聚廳分草

或郊禋行慶制命填委必聚廳分草之蘇續志

人世僊境

玉堂東西壁延袤數丈悉畫水以布之風濤浩渺擬瀛洲之象



也修篁皓鶴悉圖廊廡奇花異木羅植軒砌每外喧已寂內務  
不至風傳禁漏月色滿庭真人世之僊境也

蘇續志

### 詞臣僊職

宋太宗至上林春蠶千花萬卉妍麗冠絕上必由宴宰衡勳舊  
召兩制詞臣俯龍池垂金鈎舉觴賦詩終日而罷上嘗謂近臣  
曰詞臣實神僊之職也翊日凡所進詩悉回御毫屬和以賜焉

分紀

### 建二書閣

先是內院逼近禁闈地復狹窄前後書詔繁萃多所損潤蘇易  
簡乃於玉堂後廡建二書閣東西交映藻繪間飾自是文籍有  
所附焉閣之上下悉畫煙嵐曉景以布之

蘇志

### 有七盛事

學士今日之盛事有七新學士謝恩日賜襲衣金帶寶鞍名馬  
一也十月朔改賜新樣錦袍二也特定草麻利物三也改賜外  
庫法酒四也月俸並給見錢五也特給親事官隨從六也勅設  
供帳之盛七也凡此七事並特出異恩有以見聖君待文臣之  
優厚也

李昉禁林燕會詩序

### 神撼鈴索

唐翰林院有懸鈴以備夜直警急文書出入皆引之以代傳呼  
長慶中李德裕為學士時河北用兵一夜鈴有聲知人引其索  
視之則無人後徃徃如此使人持棒潛伺于下終無所覩而數  
數鳴動不已院中諸公私共准其鳴時皆應用兵處耗聲則急



緩亦如之曾莫之差衆咸異之元相詩云神撼引鈴索翰林故

事又唐學士院深嚴非本院人不可遽入雖中使宣事及有文

書必先動鈴索立於門外俟小判官出授授訖授院吏院吏授

學士自五代以來其制又廢蘇易簡因召對上言可其奏自是

院復置鈴索焉蘇續志

### 鵲棲海棠

宋學士院有雙鵲常棲於海棠上或鳴噪必有大詔令或宣召

之事因謂之靈鵲晁公詩云都聞靈鵲心應喜金坡遺事

### 古今文集

雜著

### 謝宣召入翰林表

歐陽修

使車入里君命在門閭巷驚傳豈識朝廷之故事緝紳竦歎以  
爲儒者之至榮在臣之愚何以堪此竊以文章之仕自古非輕  
待遇寵榮至有私人之日詢謀獻納固加內相之名恩旣異於  
常倫人愈難於稱職伏念器非宏遠識匪該明學不通古今之  
宜才不適方員之用久叨塵於侍從曾莫著於勞能而自出守  
外藩近遭家禍苟存餘喘復齒周行風波流入者十年天日再  
瞻於雙闕進退之際已蕭颯於雙毛慰勞有加賜憫憐於玉色  
形神若此志意可知身已分於早衰心敢萌於希進加以羈危  
之迹仇嫉交攻進退動繫於群言議論多煩於睿聽雖覆載之  
造每賜保全而孤蹇偷安常思引去敢謂伏蒙皇帝陛下俯憐  
舊物曲軫宸慈因內署之闕負俾備官而承乏臣敢不勉尋舊



學益勵前修感遺簪未棄之仁竭駑馬已疲之力庶申薄效少  
答鴻恩

謝宣召入院表

蘇子瞻

詔誥春溫再命而倭使華天降一節而趨在故事以常聞豈乎  
生之敢望省循非稱愧汗交深中謝竊以視草之官自唐爲盛  
雖職親事祕號爲北門學士之榮而祿薄地寒至有京兆掾曹  
之請豈如聖代一振儒風非徒好爵之糜兼享大亨之養玉堂  
賜篆仰淳化之彌文寶帶重金佩元豐之新渥旣厚其禮愈難  
其人而臣以空疎冗散之材衰病流離之後生還萬里坐閱三  
遷不緣左右之容躡處賢豪之上此蓋伏遇皇帝陛下生資文  
武天昨聖神雖亮陰不言尚隱高宗之德而訪落求助已啓成  
王之心首擇輔臣次求法從知人材之難得采虛名而用臣敢  
不益勵初心力圖後效才不逮古雖慙內相之名志常在民庶  
免私人之誚

再謝宣召入院表

蘇子瞻

里巷傳呼親臨詔使私庭望拜恭被德音人言稽古之榮臣有  
素餐之愧懇辭雖至成命莫回伏以朝論所高禁林爲重非徒  
翰墨之選乃是將相之儲禮絕同僚歎裴李於坐上功成異域  
得頗牧於禁中宜有異人來膺此選而臣顛愚自信狂直不圓  
先帝憐其孤忠欲召而未果陛下出於獨斷決用而無疑曾未  
周歲而閱三官試以百爲而無一可保全已幸擢用何名此蓋  
伏遇太皇太后陛下德協天人心存社稷受聖子之託天下抱



神係而朝諸侯巍巍其有成功不見治迹斷斷而無他技專用老成推其類以及臣顧何能而在此忠義之報死生不移

謝宣召入院狀

洪邁

王言出綽從習漢以來宣君命在門竦里閭而改觀光生圭華榮動簪纓伏念臣文習卑凡學尤底滯久汗其泉之橐從再聞長樂之鍾聲披雲覩青天幸親逢於聖旦閣道通丹地忽驟覲於仙晨共誇稽古之榮實啓臨深之懼茲蓋伏遇皇帝陛下聖聰溥博義問宣昭煥有文章已極高明之蘊旁招俊乂不遺鬼瑣之微俾彼皇華施于私室臣敢不祗承嘉惠勉策駑資見山東德化之成方竊窺於大澤動河北武夫之聽或有助於中興

謝宣召入院表

直西山

來從商服未宣民版之勞召實北扉猥被宸論之寵光生里巷榮動簪紳竊觀列聖之用人惟待詞臣而加禮蓋以言語文章之外責其論思獻納之忠或雖忤旨而暫閒終必棄瑕而復用脩除翰苑在環滁出守之餘軾侍禁庭亦赤壁歸來之後豈非加歲月則其文老涉憂患則其慮長乃登邃嚴以備顧問如臣者才華弗競慙拙自將掌先朝內制者六年每慙越俎迨陛下初元之再命竟許循墻以馳驅州縣之頻且廢放山林之久見聞寢少藝業益荒結茅屋於雲邊已其終老瞻玉堂於天上若隔前生敢云白首之重來誤入清衷之妙簡獲玷久虛之選幾成三入之榮茲蓋伏遇皇帝陛下肆筆成文解絃更化志孚群聽欲下山東之書念在邊陲或訪河西之事必有端良之彥以



充供奉之班奚取臣愚俾承人之臣敢不益堅晚節思答隆知  
賜宮錦而嘉草詔之能雖非敢望卽金鏡而擿任賢之要則所  
自期

奏翰苑名稱劄子

周必大

臣近者志其冒昧輒引故事恭乞宸翰刻寘玉堂嘗蒙宣諭何  
字可代英廟嫌名伏緣直廬之類皆未穩當倉猝未知所對連  
日思索敢爲二說仰瀆睿聰臣竊見唐有集賢殿書院蓋集賢  
殿之書院也其後置學士院往往因所御宮殿而寓直焉若駕  
在大內卽置院於明福門駕在興慶宮則置院於金明門德宗  
嘗召學士對浴堂則又移院於金鑿殿此正如漢有玉堂殿而  
許臣下待詔於其側唐置書院於集賢殿以處文學之士也今

擬作玉堂之院未審聖意以爲然否臣又聞漢因避諱改禁中  
爲省中自是相承凡官舍在禁庭者通謂之省除三省不可比  
擬外如後省散騎省祕書省殿中省其名不一杜甫詩曰上君  
白玉堂倚君金華省殆此義也若作玉堂之省亦頗近古或二  
者皆不可用卽乞出自聖裁臣妄陳管見罪當萬坐無任戰慄  
之至

律詩

憶夜直金鑿殿

李紳

日當銀漢玉繩低深聽簫韶碧落齊門壓紫垣高綺樹閣連青  
瑣近丹梯墨宣外渥催飛詔草檄深恩促換題明日獨歸花路  
過可憐人世隔雲霓



六月十六日宣鎖

洪咨夔

禁門深鎖寂無譁濃墨淋漓兩相麻唱徹五更天未曉一池月  
浸紫微花

十一月五日鎖學士院

洪咨夔

樓頭禁鼓試初撾催草江淮督使麻落紙一簾風雨疾不知斜  
墨陣翻鴉

召試學士院

王欽臣

翠翠陰陰白玉堂長年來此試文章日斜奏罷長楊賦閑拂塵  
埃看畫墻

翰林學士承旨

歷代沿革 **唐**玄宗始置翰林學士而無承旨 **憲宗**又置學士承

旨永貞元年始命鄭絪為之大誥令大廢置承相之密書內

外之密奏上之所甚注意者莫不專受專對居東第一閣 **元**

**後唐**明宗天成八年敕翰林學士入院必以先後為定唯

承旨一員出自朕意不計官資先後在學士之上 **宋**承旨不

常置於院中久次者一人充 **元**翰林院置學士承旨又置學

士及侍講侍讀學士直學士之員

群書要語禁林分直法本六人帝語親承舊惟一老 唐制詞冠

內朝供奉之班極儒者遭逢之盛 唐文粹號令典冊皆更其手

李德裕集

**詩句**翰林承旨貴清淨玉堂中 太宗賜蘇易簡詩 白麻紅燭夜

清漏紫微天 溫庭筠 天上張公子宮中漢客星 杜甫贈張四學



翰林通華蓋鯨力破滄溟紫誥仍兼綰黃麻似六經同上紫  
 殿承恩歲金鑿入直年人歸三島路日過八花博韓渥詔出芝  
 泥封去潤朝回蓮燭賜香來楊徽之玉堂作粉署重遊來憶舊  
 蟠桃開盡海山秋寧知不是神僊骨上到鰲峰最上頭宋祁守  
 益州以翰林承旨召以詩寄丞相

古今事實

廷老

鄭綱為內廷之老首定大計

院長

沈傳師入翰林為學士翰林缺承旨次當傳師穆宗欲面命辭  
 曰學士院長參天子密議次於宰相自知必不能因稱疾出六

召詢時事

韋澳為承旨與同僚蕭真為宣宗器遇二人同直無不召見詢  
 訪時事

多識朝章

唐穆宗以杜充穎多識朝章拜為中書舍人學士承旨

論事可否

唐韋澳凡有邦國刑政大事中使傳旨草詞澳心欲論諫即曰  
 此一事須降御札方敢施行遲留至旦必論其可否

處事機密

唐韓渥昭宗時進承旨處事機密與帝意合

獨承密命



翰林院例置學士六人內年深德重者一人為承旨所以獨承  
密命故也德宗好文尤難其選正元以後為學士承旨者多至  
宰相焉

### 九參大政

自永貞鄭綱為承旨十七年間由鄭至杜十一人而九參大政  
若此則安可以昧陋不肖之積繼居九丞相二名卿之後唐元  
稹承旨院記

### 草立儲制

順宗風噤不能言時太子未立牛美人有異志中外洶懼召鄭  
綱草立儲制綱搦管便書立嫡以長四字跪而上呈乃定憲宗  
綱之力也即位拜平章事

### 不草相麻

韓渥進承旨宰相韋貽範母喪詔還位渥當草制曰腕可斷麻  
不可草

### 位學士上

唐舊制學士無得以承旨為名者應對顧問參會弟班以官為  
上下憲宗永貞元年始命鄭綱為承旨位在諸學士上居東第  
一閣承旨院記唐明宗勅今後學士入院並以先後為定惟  
承旨一員不計官資先後在學士上五代史

### 賜功臣號

後唐同光中賜承旨盧質論思翊佐功臣旋授節制河中同上

### 草直言詔



韓維除翰林學士承旨神宗命公草詔求直言詔出人情大悅

擬大言賦

淳化四年上草宋玉大言賦賜蘇易簡因擬宋玉作大言賦以獻

進敬器戒

蘇易簡為承旨當禁直以水試敬器太宗曰聞卿所玩非敬器

耶易簡曰然乃進日中則昃月滿則虧器盈則覆物盛則衰

願陛下持盈守成念終如始固萬世之業則幸甚並言行錄

古誥無加

張方平為承旨神宗親劄曰卿文章典雅煥然有三代之風而

又善以多為少意博辭寡雖古訓誥亦無以加也

近世無比

王拱辰自承旨除叅政不數日以憂服去除以宣徽使

間王珪為承旨韓絳戲之曰行將入宣徽使參政遂大

拜近世承旨之達無比此也同上

有旨不試

故事知制誥必試仁宗知歐陽修有文有旨不試後遷承旨傳

處性自得

章得象處性簡重在翰林十二年怡然自得事畧

賜飛白字

淳化二年十月承旨蘇易簡獻續翰林志二卷太宗賜御詩二

章又詔飛白書玉堂之署四字以賜謂宰相曰卿可召至中書

授之他日為翰林中羨事會要

淳化二年十月承旨蘇易簡獻續翰林志二卷太宗賜御詩二章又詔飛白書玉堂之署四字以賜謂宰相曰卿可召至中書授之他日為翰林中羨事會要



賜上尊酒

淳化二年十二月承旨蘇易簡於本院會學士等觀飛白及二等書體上聞之賜上尊酒太官設饌各賦七言詩宰相參政亦各賦詩易簡悉以上言翌日帝曰朕諷讀數四有以見儒墨之盛學士之貴也 同上

就院賜物

近例就院轉官惟承旨則賜分物勅設如初拜之禮餘不得比矣 蘇續志

然窓引燭

玉堂東承旨閣子窓格上有火然太宗嘗夜幸玉堂蘇易簡為學士已寢遽起無燭具衣冠宮嬪自窓格引燭入照之至今不

欲更易以為玉堂一盛事 筆談

得乘廐馬

乘輿奉郊廟承旨得乘廐馬自浴堂殿由內朝以從 蘇志

得昇丹鳳

揭雞竿布大澤得昇丹鳳之西南隅外賓客進見則上直禁中

五鳳齊飛

太宗時賈黃中宋白李至呂蒙正蘇易簡五人同時拜翰林學士承旨扈蒙贈之詩云五鳳齊飛入翰林其後呂為相賈李蘇參政宋為尚書 廬陵詩注

三體刻賜

淳化二年十月承旨蘇易簡請以御賜三詩刻石帝為真草行



事文類聚新集 卷之二  
三體命待詔刻石以賜易簡 蘇志

古今文集

雜著

翰林承旨謝表

蘇子瞻

使星下燭生蓬華之光華天澤旁流及桑榆之枯槁國有用儒之盛士知稽古之榮伏以翰墨之林號稱內相文章之外不取他才至於用人可以觀政文武並用或成頗牧之功邪正雜居至有佞文之患惟貴且近故難其人而况金鑿玉堂親被絲綸之密北扉東閣獨稱羊德之高必有異人以齊衆口而臣本緣衰病出守江湖以一方凋弊之餘當二年水潦之厄戴星而治僅免流亡及召而還恍於夢寐交親迎勞井邑聚觀驚華髮之

半空葵丹心之未報宜授閑散以養衰殘豈期過採於虛名復使榮加於舊物此蓋伏遇皇帝陛下德如乾健明配日中既祖述於禮履躬行於舜孝才難之嘆人誦斯言緣先帝之德音收孤臣於散地言雖直而無罪身愈遠而益親委曲保全始終錄用臣敢不更磨朽鈍少補涓埃難得者時未有捐軀之會勿欺而犯誓無患失之心臣無任感天荷聖激切屏營之至

再入翰林謝表

蘇子瞻

衰遲無用寵既溢於當年天眷有加恩復隆於晚節使華臨幸天語丁寧聳里巷之驚觀嘆朝廷之用舊復以禁林分直法本六人帝語親承舊惟一老不緣名次之先後斷自上心之簡求冠內朝供奉之班極儒者遭逢之盛凡膺此選宜得異材而臣



本以愚庸累塵器使初無已試之效但多過實之名千里闕庭  
二年江海憂深投杼豈無三至之言詔復賜環不待一人之譽  
此蓋伏遇太皇太后陛下道無私載公生至明以七年之照臨  
觀群臣之邪正知臣剛褊自用雖有寬饒之狂察臣忠鯁不移  
庶幾長孺之守故還舊物益茂新恩臣敢不早夜以思歿生不  
易雖桑榆之景已迫殘年而犬馬之心猶思後效

辭免吏部尚書兼翰林學士承旨奏狀

周必大

寵光下集感懼中深切以吏部設官卿列三銓之首禁林分職  
命尊一老之承諒非望實之交孚安得恩榮之並受如臣者性  
資昏鈍間學荒蕪綿力薄材事業每居於人後高官厚祿選除

常在於衆先分毫未答於殊知積累更多於幸會儀曹再至禮  
文獲預於討論翰苑重游典冊屢系於潤色已溢銜罍之量方  
隆天地之恩外朝高南省之班內直冠北扉之秩求閑而劇旣  
難強於精神宜退而遷亦懼招於議論思追貪饕之誚寧干逋  
慢之誅伏望皇帝陛下明君知臣慈父愛子察臣吏才素短詎  
應付之銓衡憐臣筆力已衰難復責之翰墨收還異數改畀實  
能庶幾毛玠之清可踰於魏毋使鄭綯之密獨見於唐

謝吏部尚書兼翰林承旨謝表

周必大

頻年人侍徧塵清近之班兩職並陞復冒殊尤之寵賁服章於  
朽質被鞴策於名駒異渥出來危衷震惕中謝臣伏聞漢以尚  
書爲喉舌唐以翰苑爲腹心明光書省之嚴瓊能接武浴殿金



事文類聚卷之二十一  
鑿之邃頗牧在中允預遷掄已爲要劇矧疊膺於印組足增耀  
於簪紳如臣者天分弗高人才甚下自惟始願不踰州縣之間  
誰意晚塗浸躡賢豪之上揆分數祈於罷免疏榮更誤於褻遷  
冠秩序於南宮進班聯於東閣胡瞻鶻特久慙受祿之無功兼  
取熊魚彌愧舍生而取義二儀施大一介命輕此蓋伏遇皇帝  
陛下文武生知聖神廣運使人也噐隨良祿以無遺與物爲春  
舉根芟而畢遂是容賤士仍黜高門惟聖朝法令之具存初不  
勞於裁鑒而明主德功之俱懋亦何待於論思第當守三尺以  
不欺且復盡一心而無隱庶持孤節仰報鴻私

翰林承旨學士廳壁記

元 稹

舊制學士無得以承旨爲名者應對顧問參會班第旅次以官

爲上下憲宗章武孝皇帝以永貞元年卽大位始命鄭公綰爲  
承旨學士位在諸學士上居位在東第一閣乘輿奉郊廟輒得  
乘廐馬自浴殿由內朝以從揭雞竿而布大澤則昇丹鳳之西  
南隅外賓客進見於麟德則直上禁中以俟大凡大詔令大廢  
置丞相之密畫內外之密奏上之所甚注意者莫不專受專對  
他人無得而參非自異也法不當言用是七十年間由鄭至杜  
十一人而九參大政其不至者衛公詔及門而返事適然也至  
於張則弄相印以俟其病間者久之卒不興命也已若此則安  
可以昧陋不肖之積繼居九丞相二名卿之後乎俛瞻仰覩如  
遭大賓每自誨其心曰以若之不俊不明而又使欲惡歌曲攻  
於內且決事於冥冥之中若之無暴揚報校之慮遂忿行於私



易易也然而陰潛之神必有記善惡之餘者以君父之遇若如是而猶舉枉錯直可乎哉使若之心忽而爲他人盡數若之所爲而終不自愧斯可矣昔魯恭王餘畫先賢於屋壁以自警臨我以十賢之名氏豈直自警哉由是謹述其遷授書于座隅長慶元年八月十日

翰林學士

歷代沿革 **唐**太宗時名儒學士時召草制然猶未有名號乾封以後始號爲比門學士元宗初置翰林待詔掌四方表疏批答應和文章繼以詔敕文誥悉由中書多壅滯始選朝官有詞藝學識者入居翰林供奉別吉然亦未定名制詔書敕猶或分在集賢開元二十六年始以翰林供奉改稱學士選用

益重而禮遇益親至號爲內相又以爲天子私人凡學士無定員下自校書郎上及諸曹尚書皆爲之入院一歲則遷知制誥未知制誥者不作文書 **晉**天福五年詔翰林學士院公事宜並歸中書舍人自是舍人畫直者當中書制夜直者當內制至開運元年復詔翰林學士與中書舍人分爲兩制各置六員 **宋**翰林學士掌內制制誥赦救國書及宮禁所用之文辭凡后妃親王公主宰相節度使除拜則學士草詞授待詔書訖以進赦降德音則先進草大誥令及外國書則具本稟奏得畫亦如之凡拜宰相或事重者宣詔面諭旨則給筆札書所得旨稟奏歸院具詞以進餘遣內侍授中書省熟狀亦如之若已畫旨而有未盡則論奏貼正乘輿行幸則侍從



以備顧問有所獻納則請對或奏對凡初命為學士皆遣使就第宣詔旨召入院淳化二年以翰林學士賈黃中蘇易簡同知京朝官考課李沆權判吏部流內銓故事學士掌內庭書詔指揮邊事曉達邊謀天子機事密命在焉不當豫外司公事蓋防纖微間或漏省中語故學士院嘗在金鑾殿側號為深嚴自太祖以來藉其才用始令判三銓及知太常禮院事天聖元年詔學士遇隻日至晚出宿蓋故事以隻日鎖院隻日降麻也

群書要語學士非文章則不可為金坡遺事學士之職本以文

學言語備顧問出入侍從因得參謀議納諫諍其禮尤寵職林

中廐之馬代其勞內厨之膳給其食白居易集居是職者人物

之選亦已極矣儒墨之榮亦已至矣蘇易簡集非徒翰墨之選

乃是將相之儲東坡謝表公未為近臣所著皆文士之詞也以

才麗為主自入為學士至宰相以後所執筆者經綸制置裁成

潤色之詞也以識度為宗觀其發德音福生人沛然如時雨褒

元老論功臣穆然如景風命相之冊和而莊命將之誥昭而毅

劉禹錫韋處厚集記先後左右以道義輔予豈特專文墨視草

而已丁未錄三神山上曾陪鶴架之遊六學士中獨有漁翁之

嘆王禹偁賀同在翰林而拜相者

**詩句**君臣千載會答曰忠孝一生心太宗賜蘇易簡詩善保興

居調飲食副予前席待名賢真宗賜楊億詩何處春深好春來

學士家鳳書裁五色馬鬣剪三花白居易視草北門唐學士擁

德壽堂



旌西去漢將軍

馮道送承旨盧質赴河中節度

紫殿承恩歲金

鑿入直年人歸三島路日過八花墀

韓偓詩

紫薇芒動詞初出

紅蠟香殘詰未封

温庭筠上肅翰林

青綸輝映輕前古丹地深

嚴隔世塵

曹黃中宴會詩

宸章照耀詠詞林

李沆玉堂作

六鰲

雲海冠蓬萊玉署深嚴枕斗魁

楊文公

衣惹御香拖瑞錦筆宣

皇澤灑春霖

李昉禁林燕會作

我無謫僊句待詔沉香亭空騎

內廐馬僊伏隨雲駟

東坡

人間風日不到處天上玉堂森寶書

想見東坡舊居士揮毫百斛瀉明珠

黃山谷

故人飛上金鑾殿

東坡次韵鈹穆父

玉堂揮翰手如飛

東坡

玉堂書捲文書盡鈴

索不搖鍾漏永

同上

古今事實

北門學士

劉禕之遷右弘文館直學士高宗密與叅决政事以分宰相權

時稱北門學士

唐本傳

東頭學士

敬宗喜為歌詩議置東頭學士以備燕狎劉栖楚薦熊玗王

萬選學士

張鷟文詞猶青銅錢萬選萬中時號青錢學士

唐書

八軛學士

北廳前階有花軛道冬中以日影過五軛為直入之侯李程性

懶常過八軛乃至眾呼為八軛學士

李程傳

稱為三俊



唐李紳能歌詩諷誦多在人口穆宗召為學士與李德裕元稹同在禁署時稱三俊情意相善唐書

謂之三昧

學士每下直出門謂之小三昧出銀臺門上馬謂之大三昧言去纏縛而暫解脫也翰林志

李謫僊

李白天寶初至長安見賀知章知章見其文嘆曰天上李謫僊人也薦之玄宗召至金鑾殿奏頌一篇詔供奉翰林本傳

元才子

唐穆宗在東宮有妃嬪誦元稹歌詩以為樂曲者知是稹所為宮中呼為元才子荆南監軍崔潭峻歸朝出建昌宮詞一篇奏

御穆宗大悅即日拜祠部郎中知制誥後遷翰林學士

謂登瀛洲

太宗初作文學館以房杜等十八人為學士每訪以詩書政事號十八學士命閭立本圖像以章禮賢天下仰慕謂之登瀛洲

置金鑾殿

李白召見奏頌一篇帝大悅置之金鑾殿出入翰林中間以國政潛草詔誥人無知者李白集序

有大手筆

唐李德裕吉甫之子穆宗即位召入翰林為學士禁中書詔之大手筆多令德裕草之本傳

授大學士



張說朝廷大述作多出其手帝好辭有所為必使視草帝欲授  
大學士辭曰學士本無人稱固辭乃免本傳

文思如泉

唐陸贄為學士從幸奉天時機務填委詔書數百贄揮翰起草  
思如泉注初若不經思慮既成之後莫不曲盡事情中於機會  
同舍皆服其能嘗啓德宗今盜遍天下陛下宜痛自引過以感  
動人心陛下誠能以言謝天下使詔書無所忌臣雖愚陋可以  
仰副聖情庶令反側之徒革心向化德宗然之故奉天所下詔  
書雖武夫悍卒無不揮涕感激多贄所為也本傳

辭速若射

陸扆進為翰林學士中書舍人扆博學屬辭敏速若射注然一

時書命同寮自以為不及昭宗優遇之本傳

筆無點竄

杜讓能以學士從僖宗在蜀關東用兵書詔雲委讓能詞才敏

速筆無點竄動中事機帝嘉之本傳

辭皆允切

唐劉瑑字子全擢翰林學士時宣宗始復開隴裁處叢繁詔書  
數十捉筆遽成辭皆允切

善內庭文

昭宗嘗金鑾作賦詔學士皆和獨陸扆先成帝覽之嘆曰正元  
時陸贄吳通玄兄弟善內廷文後無繼者今朕得之陸扆傳

論中官事



李絳字深之元和中為翰林學士孜孜以正諫為已任嘗極論中官縱恣方鎮進獻之事又次君臣成敗為連屏本傳

論次新書

劉禕之少以文辭稱遷右弘文館直學士上元中與元萬頃等召入禁中論次新書本傳

多知典故

張垺以中書舍人充翰林學士能伺候人主意博涉經史多知典故

浴堂召對

柳公權為翰林學士每浴堂召對繼燭見跋語尤未盡不敢取燭宮人以蠟淚揉紙繼之本傳

內廷貯相

唐之貴文至矣後王纂承多以國柄付文士元和初憲宗尊聖祖故事視有宰相噐者貯之內廷繇是釋筆硯而操化權者十常八九劉禹錫李絳集記

禁中視草

常袞翰林學士制視草北宮又唐至德後天子召集賢學士於禁中草書詔雖宸翰所揮亦資其檢討謂之視草翰林志

簾內揮翰

唐李吉甫與裴垺同直垺草吉甫除平章制吉甫草武元衡制垂簾揮翰兩不相知垺盡紙筆之後乃相慶賀禮絕之敬生於座中及明日院中學士送至銀臺門而相府官吏候於門外禁



事文類聚新集 卷之二十一  
署之盛未之有也 翰林志

號為內相

陸贄入翰林年尚少以材幸天子常以輩行呼而不名帝所親倚至解衣衣之雖外有宰相主大議而贄常居中叅裁可否時號內相 本傳

久在內職

鄭綱為翰林知制誥在內職十三年小心兢謙上遇之頗厚

侍御擡輦

姚崇為翰林學士明皇在便殿甚思姚崇論時務七月十五日苦雨不止泥濘盈尺上令侍御者擡步輦乃學士來中外榮之

宮嬪呵筆

李日於便殿對明皇撰詔誥時十月大寒筆凍莫能書字帝敕宮妃十人侍白左右執牙筆呵之白遂取貝書其受聖眷如此並開元遺事

力士脫靴

李白少有逸才初客遊會稽與道士吳筠隱於剡中既而玄宗詔筠赴京師筠薦之於朝遣召與筠俱待詔翰林白嗜酒日飲酒肆玄宗度曲欲造樂府新詞亟召白已卧酒肆笑召入以水灑面沉醉殿上引足令力士脫靴

寶牀賜食

李白召見明皇以七寶床賜食御手調羹以飯之謂曰卿是布衣名為朕知非素蓄道義何以及此置之金鑾殿出入翰林中



問以國政

山池曲宴

宣宗雅好儒士每山池曲宴與學士屬和詩每公卿出鎮亦賦詩餞行時論以大中之政有貞觀風

賜蓬池鱸

李白詩曰荷淨蓬池鱸天寒郢水醪唐學士初上賜食悉是蓬池鱸夏至頒冰及酒以酒味和冰而飲蓋禁中郢水酒坊

賜蓮花燭

令狐趙公大中初常便殿召對夜久方罷宣賜金蓮花燭送歸院院吏以下謂是駕來俄傳學士歸院莫不驚異金蓮花燭柄耳至尊方有之

御饌輟賜

唐德宗雅尚文雅注意是選乘輿每幸學士院顧問錫賚無所不至御饌珍脩輟而賜之又嘗召對於浴堂移院於金鑾殿對御起草賦詩唱和或旬日而出

朝服始見

宋陶穀為學士嘗召對太祖御便殿穀至望見上將前復却者數四左右傳宣甚急穀終徬徨不進太祖笑曰此措大索事分顧左右取袍帶來上已束帶穀遽趨出又王曾為翰林學士直日真宗首召之燕衣坐便殿謂曰渴欲見卿因不及朝服無謂朕嬾近臣

覆以禴袍



唐韋綬德宗時為翰林學士密政多所參逮帝嘗幸其院韋如  
從會綬方寢時大寒以妃蜀襦袍覆而去其待遇如此

賜以寒衣

德宗幸金鑾院問學士鄭餘慶曰近有衣否餘慶云往時賜衣  
不煩更作上曰乃常例爾遂特賜繒纈令為寒衣

綠衣賜紫

後唐莊宗卽位除馮道為省郎充翰林學士自綠衣賜紫

品服賜金

宋李西樞為知制誥尚衣緋出守荆南召為學士閣門舉例賜  
金帶而不可加於賜緋乃并賜三品之服

更大典冊

李德裕擢翰林學士凡號令大典冊皆更其手

不專辭藝

德宗以段文昌張仲仁為學士韋貫之以為學士以備顧問不  
宜專取辭藝奏罷之

父子並命

趙宗儒父驍德宗欲寵其門使一日並命

兄弟對掌

趙光逢為翰林學士光裔知制誥兄弟對掌內外命書士歆羨之

兄弟相繼

于休烈二子益肅及休烈相繼為翰林

便至公輔



睿聖登極段文昌杜元穎不離內庭便至公輔及寶曆以後韋處厚恩深授選亦自翰林由是稍爲故事或不至者以爲耻翰林內志

### 卽拜平章

唐劉瑒始在翰林帝素禮遇至是手詔追還後請問帝視案上曆謂瑒曰爲朕擇良日瑒跪曰某日良帝笑曰是日卿可遂相卽詔拜中書門下平章事

### 作明河篇

宋之間天后朝求北門學士不許作明河賦以見其志其詩末曰明河可望不可親願得乘槎一問津更將織女支機石還訪成都賣卜人則天見其詩謂崔融曰非不知宋之間有奇才但

恨有口過耳宋終身慚憤口過謂口臭耳

### 進新樂章

是時禁中刑重木芍藥明皇在沉香亭謂左右曰對名花賞妃子豈可片舊樂急就翰林命李白進新樂章白應詔揮筆立成一章曰名花傾國兩相歡長得君王帶笑看解釋春風無限恨沉香亭北倚欄杆

### 作賜衣詩

柳公權充翰林書詔學士從幸未央宮苑中上駐輦謂公權曰我有一喜事邊上衣賜久不及時今年二月給春衣訖公權前奉賀上曰軍賀未了卿可賀我以詩宮人迫其口進公權應聲曰去歲蚩尤戰今年未得歸皇恩何以報春日得春衣上悅歎



賞久之

草邊將詔

封敖爲翰林學士武宗深重之嘗草賜陣傷邊將詔警曷曰傷居爾體痛在朕躬武宗覽而善之賜以宮錦

號下水船

姚洎爲學士梁祖問及裴延裕曰頗知其人思敏洎曰向在翰林號下水船梁祖曰卿便是上水船也洎甚慚

摘葉草制

李琪每臨流坐石摘木葉試草制詞宋梁時果爲翰林學士

夢掌抽筆

僞蜀辛寅遜夢掌中抽筆占者曰公遷翰林學士未幾果然

座主同任

李澣爲翰林學士常升殿侍宴澣衣綠左右指令退澣叱之遂賜緋與座主和凝同任學士會凝入相澣當草制命開凝閣盡取器玩圖書以歸其縱率如此

門生對草

封敖之子舜卿開平中與門生鄭致雍同入翰林致雍有俊才舜卿思拙澁每對草綸誥不勝困敝託致雍秉筆當時議者以爲座主辱門生

擢居清近

宋陳彭年新授翰林學士上賜歌詩一首因謂何敏中曰頃命學士罕會賜詩彭年詞學優長擢居清近久益慎密多聞好學



鮮有憎者

為卿潤色

宋錢若水為翰林學士草詔既成以進上笑曰朕欲為卿潤色可乎若水頓首謝因命筆親竄數字引咎深切尤為精當

進狀連署

唐崔群為翰林學士常以謹言正論於時憲宗嘉賞降宣旨云自今學士進狀並取崔群連署名方與進來

每事裁定

宋陳彭年為學士檢討典故質正文義每一事具載經史子籍備而後已上曰詳定所事無大小皆候彭年裁制而後定一句不可廢也

有宰相器

王旦為翰林學士中外皆以為有宰相器嘗奏事下殿真宗曰送之曰與朕致太平必斯人也

真侍從臣

歐陽修在翰林仁宗見御閣春帖子讀而愛之問左右曰學士歐某之文也乃悉取宮中帖子閱之見其篇篇有意歎曰舉筆不忘規諫真侍從之臣也

為好長者

晁迥字明遠遷翰林學士真宗稱迥為好長者楊億嘗謂迥所作書命無過褒而得代言之體

誠好翰林



事文類聚新集 卷之二十一 神宗語吳奎曰已召王安石誠好翰林學士也

神仙中人

周麟之為學士姿儀灑落進止凝重班冠玉笋望之者意神仙中人

甘泉從臣

先朝翰林學士不領他局故俸薄楊億為學士有乞郡表畧曰虛忝甘泉之從臣徒作若敖之餓鬼自後乃得判他局

禁中頗牧

畢誠為翰林學士党項羗擾河西宣宗召學士對誠論破羗之狀上曰不期頗牧在吾禁中即用誠守河西本傳又宋朝李文

定公迪真宗時為學士上問陝西兵幾何對曰臣向在本道以

小冊書兵馬粮草之數以備調發今猶置佩囊中帝令採取之目黃門取紙筆令具疏帝曰不意頗牧復在吾禁中

當時楊劉

劉筠字子儀仁宗即位復召為翰林學士筠自景德以來居文翰之選與楊億齊名當時號為楊劉三入禁林

以宿儒處

乾德元年竇儀為翰林學士太祖謂宰相曰深巖之地當以宿儒處之范質對曰竇儀清介重厚然頃自翰林遷端明帝曰禁中非此人不可

非它官比

淳化四年以張洵錢若水並為翰林學士洵等赴上帝曰學士



之職清切貴重非它官比朕常重此官故事學士赴上有勅設  
當令設之

覽詔甚悅

錢宣靖公若水爲學士太宗禮遇殊厚嘗草賜趙保忠詔云不  
斬繼遷存狐兔之三穴潛疑光嗣持首鼠之兩端太宗覽之甚  
悅謂若水曰此四句正道着我意

視草甚勞

周必大爲學士召見上謂公視草勞甚公奏無汗馬之勞致此  
爵位上曰翰墨之功豈小補哉若大述作固當煩卿

常戒諸子

李昉素病心悸每數歲一發常語諸子曰我典誥命三十年勞

役憂思而致是疾爾曹當戒之

因歎老卒

梅詢爲翰林學士一日書詔頗多構思甚苦推觚循堦而行忽  
見老卒卧於日中欠伸甚適梅忽歎曰暢哉徐問之曰識字乎  
曰不識梅曰更快活也

步入掖門

宋選人不得乘馬入宮門天聖中選人爲館職自歐陽修輩始  
時號步行學士皆自左掖門下馬步入

雜坐客位

宋朝學士循唐故事見宰相不具靴笏坐玉堂遣吏計會直省  
官宰相出迎近時始具靴笏至中書與常叅官雜坐於客位有



移時不得見者學士日益自卑

朱衣隻引

故事學士在內中院吏朱衣隻引李昉以太宗在南衙朱衣一人前引昉亦去其一遂為例

佩魚始賜

滿宗孟為翰林學士神宗曰學士職清地近而官儀未寵自今宜佩魚學士佩魚自宗孟始

特賜出身

韓門下維以賜出身熙寧末特除翰林學士崇寧中林彥振擢賜出身用韓例亦除翰林學士宋有國以來不由科第除者此三人同上按韓省試中以兄憶執政不就廷試後為館職以至

兩制未嘗賜第也

宜充修史

元祐二年敕新授翰林學士充史館修撰張策修撰職名稱卑不稱內廷密重宜充兼修國史續通典

兄相弟草制

曾文昭公肇字子開上命魯公相適視草禁中因舉數事為戒宋朝學士弟草兄制惟韓氏與公士論榮之言行錄又熙寧初

韓子華絳拜相其弟持國雍在翰苑神宗前期預令草制注意

厚矣持國懇辭兄弟之嫌得請元符末曾子宣爰立其弟子開

直北門特命草麻示眷寵也謝飯四大談塵

弟相兄草麻



錢惟演云希白易於子為從兄也天聖三年十二月予叅鈞衡之命時希白自當制世稱弟拜相兄草麻自古未有金坡遺事

一夕草五制

晁宗懿字世良真宗時為翰林學士一夕草除將相五制事畧

一夕草三制

哲宗元祐初除呂公著司空平章事呂大防左僕射范純仁右僕射上御闈殿見學士蘇軾曰呂公著以疾求去不欲煩以事故以三公留之是夕鎖院苦寒詔賜宮燭法酒軾一夕草三制俱畢且飲酒賦詩次日以詩呈同院人皆服其精敏聞見錄

如漢制誥

治平四年以司馬光為翰林學士光辭以不能四六上曰如兩漢制誥可也內侍以誥置光懷中光不得已受於是上疏論修心之要曰仁明武治國之要曰信賞必罰用人之要願陛下勿以為迂闊長編

多至為相

宋自建隆至熙寧在翰苑者一百八人而入端揆者二十一人太祖九人一相太宗二十三人四相真宗十五人四相仁宗五十二人九相神宗十人三相自建炎至淳熙在翰苑者七十六人而入端揆者九八人高宗五十八人五相孝宗十八人三相

朝野雜記

學士久次

學士久次者晁文元迥十六年王文恭珪十三年王文忠堯臣



十二年宋文安白章文獻得象趙清獻扑楊內翰偉皆十一年

陶尚書穀丁文簡度皆十年扈尚書蒙蘇參政易簡賈參政漢

中李昌武宗諤孫文懿扑胡文公宿皆九年徐常侍鉉楊文公

億皆八年歐陽常侍迥宋宣獻綬歐陽公修皆七年梁給事周

翰李相州維晏元獻殊馮章靖元皆六年熙寧後學士率一二

年即遷次者三四年而已高宗朝湯慶公孝宗朝周益公始

皆六年朝野雜記又學士再入三人者宋文安兩入凡二十年

李相州孫文懿皆十二年楊文忠公范文忠公皆九年曾宣靖

馮文簡皆七年葉道卿張文定皆六年宋景文楊宣懿皆三人

而止五年渡江後周益公再入凡九年胡端明二人跨六年久

次者此二公而已同上

學士三人

學士三人李文正劉中山子儀三人玉堂集云三人翰林皆待

詔宣獻公宋景文范景仁四人李邕五入而一不拜又渡江後

三人者二人胡端明交修王端明職兩入者十六人張文靖守

綦寶學宗禮沈忠憲與求陳資政與義孫資政近劉閣學才邵

李侍郎椿年洪文安遵錢給事周材洪文敏邁劉忠肅珙鄭資

政閻周益公必大王魯公淮倪侍郎思

父兄同為

錢文僖公記父子入院一家李文正昌武以為極盛矣其後父

子入院者又有四家錢希白子飛梁仲素莊肅蘇儼甫子容洪

忠且景伯景嚴景廬兄弟入院三家二寶可象望之二李文靖

事文類聚新集 卷之二十一 三十一



相州二錢 希白師成

以為極盛及其後兄弟入院者入九家二

陳 文肅康肅

二宋

元憲景文

二吳

正肅正憲

二韓

康國持國

蘇 文忠文定

二曾

文肅文昭

二字文

仲理仲通

三洪

文惠文安

景廬

然洪氏父子兄弟入翰苑者四人古今所未有也

同上

古今文集

雜著

中書舍人除翰林學士誥

呂伯恭

內外演綸之職獨高翰苑之清華左右持橐之臣疇若禁林之  
清密維時盛選屬我洪儒輟從西掖之聯延入北門之直具官  
學窮閭奧文冠倫魁增主之明洋洋晁董之對發帝之令渾渾  
虞夏之書休有德聲最於邇列是用進陟鑿坡之邃深居鈴索

之嚴虞待燕閑輔陪遺志典謨於二代新瞻聽於四方近天  
子之光允賴謀猷之啓沃見王者之志邇觀詔命之發揮往服  
寵章永堅素守

謝翰林學士宣召表

蘇子由

成命莫回驚使華之促召一家竦聽望雲闕以馳情實儒者之

至榮豈平生之敢望

中謝

切以翰墨之任始自有唐供奉至尊

講聞前輩止廊奏事有如李絳之忠中禁論兵復敷畢誠之智

迨我祖宗之盛最優文學之臣時舉舊章多蒙召對頃自恭潔

之後稍虛顧問之常方今聖德日躋群臣屬目益將虛前席以

博問繼夜燭而疇咨宜得雋良密侍燕語如臣草野微陋章句

拙疎十載江湖之間每群魚鳥五遷臺省之要永愧冠裳敢謂



乏人遽令至此茲益伏遇皇帝陛下天心廣大海德并包物無  
一介之微意求萬旨之舉臨朝訪道有元老之在前燕處清心  
援衆正而有助從容德盛循致承平塵露至微海嶽奚補修列聖  
之故事今將其時因間見以納忠臣亦有志

謝除翰林學士表

汪藻

非才冒寵久誇文石之班優詔傳恩趣上玉堂之直既假朝章  
之煥仍分御府之珍遜避莫從叨塵為懼中謝伏以文章雖本  
一技命令實行四方故自古禁林之除極當時儒者之選矧今  
多士尤重他官內敷帝制之坦明外應軍書之警急學非閎博  
難酬跋燭之咨思或淹遲將誤掣鈴之石當得瓌傑來承燕閒  
如臣者猥以諸生起於殿末固首尾策名之二紀中間不調者十

年會真人光復之初陪列辟駿奔之後驟膺東掖徧歷高華既  
時巡清蹕之屢移方驛召群英之未至執羈在道視草無人姑  
從東省之聯兼候北門之對嘗因多病不勝狗馬之心願賜寬  
恩任逐桑榆之暖孰云代價遂使為真茲益伏遇皇帝陛下志  
靖華夷愛深宵旰勵精於學每求稽古之臣罪已以言欲致銷  
兵之福治雖得要人豈當材臣敢不仰佩眷知力思補報絲綸  
行遠顧奚俟於丹青海嶽居微或有資於塵露

代中書舍人謝除翰林學士表

周必大

鳳掖演綸久俟黜幽之典鑿坡裁詔誤叨倮直之榮拜命周章  
捫心愧汗中謝伏以禹謨舜典周誥商盤德意具孚雖本帝王  
之惻怛訓詞播告亦須臣下之討論惟坦然明白於一心故粲



若流傳於萬世矧惟聖代丕振文風承明著作之庭畢來俊彥  
金馬玉堂之士尤遴選掄宜得名儒專承內命如臣者斷無他  
技累有至愚粗知前事之可師每歎小才之難強螢窓夜學燭  
莫望於金蓮蓬戶久居班豈知於玉笋奮身一第糊口四方叨  
逢盛世之旁求獲與群賢而並鶩驟離奧渫服在高華潤色非  
長悵已窮於薄技論思莫效居有負於厚恩切幸保全敢希進  
擢豈謂忽從四戶躡真北門以荒蕪之學而備顧問於禁林以  
駘馱之文而助發揮於睿藻寵雖至矣懼亦隨之此蓋伏遇皇  
帝陛下聖以日躋智由天錫垂拱視民之阜始終典學之修孔  
子多能集大成而自得高皇善任屈群策以無遺遂致采葑俯  
令視草臣敢不告謀猷于后以聖王爲師聽漢詔於山東少補  
中興之治布堯言於天下庶無內相之慙

謝除翰林學士表

洪邁

禁直重趨功未施於起草除書亟下命忽忝於拜真人以爲榮  
自知不稱中謝伏念臣詞章甚陋問學尤踈習氣拘牽生歿不  
離於文字宦游僥倖去來何計於鴈鳧正憐歷落之蹤趣點便  
藩之召大恩無量舊觀頓還載惟玉笋之瞻儀莫越金坡之要  
近在於聖世尤重正員魏二紀之禔期董七人之占位君臣千  
載信嘉會以難逢兄弟一時乃英躔之濫繼施生若此報答謂  
何茲蓋伏遇皇帝陛下稽古重華叅天施化坐明堂而朝群后  
方丕顯於斯文起晉陽而爲一門殊曲成於私覆肆容弱植捷  
上華塗臣敢不益所不能鞭其最後視淮南之報賜詎測津涯



去塞北之煙塵誓殫潤色

上歐內翰書

蘇老泉

洵布衣窮居嘗竊有歎以爲天下之人不能皆賢不能皆不肖故賢人君子之處於世合必離離必合往者天子方其有意於治而范公在相府富公爲樞密副使執事與蔡公余公爲諫官尹公馳騁上下用力於兵革之地方是之時天下之人毛髮絲粟之才紛紛然而起合而爲一而洵也自度其愚魯無用之身不足以自奮於其間退而養其心幸其道之將成而可以復見於當世之賢人君子不幸道未成而范公西富公北執事與余公蔡公分散四出而尹公亦失勢奔走於小官洵時在京師親克其事忽然仰天歎曰以爲斯人之去而道雖成不復足以爲

榮也既復自思念往者衆君子之進於朝其始也必有善人焉推之今也亦必有小人焉間之今之世無復有善人也則已矣如其不然也吾何憂焉姑養其心使其道大有成而待之何傷退而處十年雖未敢謂其道有成矣然浩浩乎其胸中若與曩者異而余公道亦功於南方執事與蔡公復相繼登於朝富公復自外入爲宰相其勢將復合爲一喜且自負以爲道既已粗成而果將有以發之也既又反而思其向之所慕均至愛悅之而不得見之者蓋有六人今將往見之矣而六人者已有范公尹公二人亡焉則又爲之潛然出涕以悲嗚呼二人者不可復見矣而所恃以慰此心者猶有四人也則又以自解思其止於四人者則又汲汲欲一識其面以發其心之所欲言而富



公又為天子之宰相遠方寒士未可遽以言通於其前余公蔡公遠者又在萬里外獨執事在朝廷間而其位差不甚貴可以叫呼攀援而聞之以言而饑寒衰老之病又痼而留之使不克自至於執事之庭夫以慕望愛悅其人之心十年而不得見而其人已死知范公尹公二人者則聞人者之中非其勢不可遽以言通者何可以不能自往而遠已也執事之文章天下之人莫不知之然竊自以為洵之知之時深愈於天下之人何者孟子之文語約而意盡不為巉刻行絕之言乃其鋒不可犯聲之文如長江大河渾浩流轉魚龍蛟龍萬怪惶惑而抑遏蔽滅不使自露而人望見其淵然之光蒼然之色亦不敢視執事之文紆徐委備往復百折而條達踈暢無所間斷氣

語極急言竭論而容與閑易無艱難勞苦之態此二者皆斷然自為一家之文也惟李翱之文其味黯然而長其光油然而幽俯仰揖遜有執事之態陸贄之文遣言措意切近的當有執事之實而執事之才又自有出人者蓋執事之文非孟子韓子之文而歐陽子之文也夫樂道人之善而不為諂者以其人誠足以當之也彼不知者則以為譽人亦求其悅已也夫譽人以求其悅已洵亦不為也而其所以道執事光明盛大之德而不自知止者亦欲執事之知其知我也雖然執事之名滿於天下雖不見其文而固已知有歐陽子矣而洵也不幸墮在草野泥塗之中而其知道之心又近而粗成而欲徒手奉咫尺之書自託於執事將使執事何從而知之何從而信之哉洵少年不學生



事文類聚新集 卷之二十一 四二  
二十五歲始知讀書從士君子游年既已晚而又不遂刻意厲  
行以古人自期而視與已同列者皆不勝已則遂以爲可矣其  
後困益甚然後取古人之文而讀之始覺其出言用意與已大  
異時復內顧自思其才則又似夫不遂止於是而已者由是蓋  
燒爨時所爲文數百篇取論語孟子韓子及其他聖人賢人之  
文而兀然端坐終日以讀之者七八年方其始也入其中而惶  
然博觀於其外而駭然以驚及其久也讀之益精而其胸中豁  
然以明若人之言固當然者然猶未敢自出其言也時既久胸  
中之言日益多不能自制試出而書之已而再三讀之渾渾乎  
覺其來之易矣然猶未敢以爲是也近所爲鴻工論史論凡七  
扁執事觀其如何嘻區區而自言不知者又將以爲自譽以求  
人之知己也惟執事思其十年之心如是之不隅然也而察之

律詩

答馬侍御見贈

白居易

謬入金門侍玉除煩君問我意何如  
潘木詎堪明主用籠禽徒與故人踈  
苑花似雪同隨輦官月如眉伴直廬  
淺薄求賢思自代嵇康莫寄絕交書

贈翰林

賈島

清重無過知內制從來禮絕外庭人  
看花在處多隨駕召宴無時不及身  
馬自賜來騎覺穩詩緣見徹語長新  
應憐獨向名塲苦曾十餘年浪過春

玉堂鎖院苦寒詔賜宮燭法酒

蘇子瞻



微霰霏霏點玉堂  
詞頭夜下攬衣忙  
分光御燭星辰爛  
拜賜宮壺雨露香

賀翰林侍郎二首

司空圖

太白東歸鶴背吟  
鏡湖空在酒船沉  
今朝忽見銀臺事  
早晚重徵入翰林

玉版徵書洞裏看  
沈儀新拜侍郎官  
文星喜氣連台曜  
聖主方知海內安

王學士入翰林

劉禹錫

廐馬翩翩禁外逢  
星槎上漢香難從  
定知欲報淮南詔  
促召王褒入九重

寄白學士

籍

日掌天書見客稀  
縱因休沐鎖雙扉  
幾回扶病欲相訪  
知何禁

歸未歸

上翰林

鄭獬

中使傳宣內翰家  
君王令草侍中麻  
紫泥金印封題了  
銀燭纔燒一寸花

玉堂卽事

蘇魏公

暮乃從容對玉堂  
歸來院吏寫宣忙  
郤醪獨賜尊常酒  
龍燭初然淚有香

起草才多封卷速  
把麻人衆引聲長  
百官班裏聽恩制  
爭誦雄文出未央

贈張四學士

杜甫



翰林通華蓋鯨力破滄溟天上張公子宮中漢客星賦詩拾翠  
殿佐酒塲雲亭紫誥仍兼縮黃麻似六經內分金帶赤恩與荔  
枝青無復隨高鳳空餘泣聚螢此生任春草垂老獨漂萍倘憶  
山陽會悲歌在一聽

詩話

翰林同入

白樂天詩云元和六學士五相一漁翁王禹偁賀同在翰林而  
大拜者云三神山上曾陪鶴駕之游六學士中獨有漁翁之歎  
主文同為

蘇軾政易簡登科時宋尚書曰為南省主文後七年宋為翰林  
學士承旨而蘇相繼入院同為學士宋嘗贈詩云昔日曾為尺

梁階今朝真是青雲友歐陽文忠公亦然王禹偁南省主文相  
距十五年同為學士故歐陽公詩有喜君新賜黃金帶顧我今  
為白髮翁之句二事誠一時文物之盛也

翰苑群書

作詩怨望

陶穀久在翰林意希大用其黨因對言穀宣力實多微伺上音  
太祖曰翰林草制皆檢前人舊本俗所謂依樣畫葫蘆耳何宣  
力之有穀作詩曰官職須由生處有才能不管舊時無堪笑翰  
林陶學士年年依樣畫葫蘆太祖見之薄其怨望自是決意不  
用矣

東軒筆錄

直學士院

歷代沿革唐制官序未至而他官權攝者為直官

塵史云許敬



宗直記室是也

**宋**

開寶二年以李昉盧多遜並直學士院直

院之名如此

塵史云但以資淺者為之其實正官也

六年以

知制誥張澹權直翰林院凡他官入院學士謂之直院學士

俱闕他官暫行文書謂之權

不率以從官兼直院若左右

史少監類止稱權

**詩句**

白麻紅燭夜清漏紫薇天

晁

筠

苑花似雪同隨輦宮月

如眉伴直廬

李白答司馬侍御紫

承恩歲金鸞入直年人歸

三島路日過八花磚

韓偓

日上花

簾捲後柳遮鈴索雨晴明

錢若水玉堂作

**古今事實**

欲訪時事

周顯德五年詔翰林學士職居禁廷地居清近與班行而既異  
在朝請以宜殊今後當直下直學士並宜令逐日起居其當直  
學士仍赴晚朝時世宗欲朝夕訪以時事故有是詔

皆用文士

開寶九年李文正盧相並置學士院太平興國元年湯悅徐鉉  
直學士院王克正張治直舍人院四人皆江南文士也

襍宿入直

襍音豹宿例自諸行尚書左右丞侍郎以下入直各有差

楊鉅

翰林舊規

長春曲宴

蘇易簡為叅知政事引故事為請詔自今當直學士與樞密直



學士並頒長春殿曲宴

憑鼓草詔

朱勝非字藏一直學士院時事皆草創詔書填委而院無几案公嘗馮敗鼓草詔然文氣叢重如平時

團扇親賜

汪藻字彥章直學士院草高麗答詔其不許入貢詔畧曰壞晉館以納車庶無後悔閉玉關而謝質匪用前規上顧輔臣稱公得代言之體久之麗人謝表至上復稱公真拜翰林學士以所御白團扇親書紫誥仍兼縮黃麻似六經十字以賜縉紳榮之

孫覲撰墓誌

天筆歎嘉

周麟之受詔撰張循王碑文成奏御天筆批其後十八字曰誌銘叙事詳盡造語簡要披閱數四但有歎嘉士林傳訖以為寵

乘輿扈從

徐鳳字子儀遷將作少監權直院先時乘輿出入它官攝內命者不在屬車豹尾間至是有旨令扈從遂為故事

真西山集

本官真拜

李昉入直翰林先是盧多遜已任學士太祖見昉在多遜下問其故宰相曰昉以本官直學士院未即真拜遂真拜學士在多遜之上

察官寓直

紹興二十四年春直學士院湯思退以禮部侍郎同知貢舉內



制既闕官有命監察御史王綸時暫兼權適劉婉儀進位貴妃  
綸草其制上稱有典誥體竟至大用前此無察官寓直禁林亦  
盛事也 周益公文集

古今文集

雜著

受免直學士院狀

洪邁

寵數荐降兼官愈優受恩已多拊已難稱竊以代言之任最切  
於翰林直院之名實鄰於學士臣之孤陋衆所鄙夷未至預榮  
方幸攝官而承乏序升過分未能滿歲以爲真曾是叨塵若何  
啓處願寢已行之命少須試可之長庶使微踪獲安舊署

四辭免直學士院狀

真德秀

竊惟代言儒者之至榮方命人臣之大罪夫以禁林之地最謂  
遂嚴得直其間必寵鴻碩某猥以末學初無寸長幸逢千載之  
期猥叨再入之寵平生素望何敢及茲豈不願優游玉堂之廬  
密勿金鑿之直何苦堅避自速嚴誅蓋以詔令之頒最關國體  
文章之發皆本心源而某四忝節麾一周星紀視人猶已憂公  
如家緣積思慮之勞遂得煩悻之疾比方少瘡猶未復常雖應  
酬牋翰之微莫能措手豈典掌絲綸之重可使強顏切自省循  
實難堪處昔唐韋洪景以草詔踈漏而降詘本朝范鎮以用事  
若誤而左遷彼皆名儒猶坐此失况某材旣陋甚而疾復縈之  
倘冒昧以祗承必立臻於曠敗用是彷徨累日不免仍控忱詞  
伏望朝廷特賜敷奏許令免兼上件職事實拜洪造保全之恩



辭免權直學士院狀

真德秀

選掄特異震懼靡寧切惟翰苑之置官倣自開元之定制雖典司內命號爲供奉之近班然遴簡外廷或以校讐而充選於皇孝祖參酌有唐肇新北門攝直之名以處東觀洽聞之彥惟材是用寧職之拘然自淳熙已來距今餘數十載乃若彥中而降居此惟二三人直謂至難詎容輕畀矧皇上聿新於萬化欲王言誕播於四方盍資討論潤色之英大闡溫厚坦明之制伏念某早緣干祿勉學爲文僅知場屋剽竊之工焉識朝廷嚴重之體頃從璧水入典道山老歲月於槩鉛猶慙亡補鼓風雷於號令敢謂能勝偶徼直之虛員俾謏材以承乏身雖甚寵誼有當辭昔在厚陵深嘉蘇軾欲循故事躡寘禁林觀時宰臣啓奏之言尚俟人望屬屢之後况某未能爲役何敢微榮伏望朝廷賜敷奏寢已行之誤渥疇可用之實能則名器不以假人允卹一時之公論文章足以華國漸還三代之遺風

翰林侍讀學士

侍講學士

歷代沿革

唐

開元三年上謂宰相曰朕每讀書有所疑滯無從

質問可選儒學之士使入內侍讀乃以馬懷素與褚無量更日侍讀十三年改麗正修書院爲集賢殿書院選耆儒日一人以稽史籍疑義置集賢院侍講學士侍讀直學士宋太祖始用著作佐郎呂文仲爲侍讀真宗咸平二年以楊徽之夏侯嶠並爲翰林侍讀學士先是侍讀名秩未崇真宗首置此職擇耆儒舊學以充其選班秩次翰林學士祿賜如之設直



廬於秘閣侍讀。直侍講長上日給尚珍膳夜則迭宿多召對訪問或至中夕景德四年以翰林侍講學士工部尚書邢昺知曹州班在翰林學士之上從尚書班例侍講學士外使自邢昺始天禧三年以張知白為刑部侍郎充翰林侍講學士知天雄軍府侍讀學士外使自知白始元豐官制廢翰林侍讀侍講學士不置但以為兼官然必侍從以上乃得兼之其秩卑資淺則為說書。元祐二月至端午日秋八月至長至日遇隻日入侍。邇英閣。車。官講讀元祐七年復增學士之號元符元年省去建炎元年詔特差侍從官四員充講讀官遇萬機之暇令三省取旨就內殿講讀而翰林無講讀之員講讀皆為經筵官矣。元翰林院置侍讀侍講學士復舊制也。

群書要語儒學之臣入閣侍讀所以考質疑義其列於分職始

自開元而朕九向之南豐擬制

**詩句**遙知丹地開黃卷陳后山寄蘇侍讀江沙踏破青鞋底却

結絢絲侍禁廷山谷

**古今事實**

學有師法

韋處厚通五經博覽史籍而文思贍逸穆宗以其學有師法召入翰林為侍講學士

奏陳經義

李程字表臣奏請置侍講學士數陳經義

粹擷經史



唐鄭澣文宗時為侍讀學士帝使稗獮經史為要錄愛其博而精舉諸條擿問之隨即酬折無留

### 分講經史

韋處厚穆宗時與路隨並充翰林侍講學士召入太液亭命分講毛詩關雎尚書洪範等篇訪以理體處厚等演經義以廣規諷之道從容開納賜酒果而罷

### 三侍學士

唐文宗召兵部尚書王起禮部尚書許康佐為侍講學士中書舍人柳公權為侍書學士每有疑義即召學士入便殿顧問討論率以為常謂之三侍學士恩寵異等

### 迭處禁密

向少逸代元裕為侍讀學士兄弟秩處禁密時人榮之

傳

元裕

### 入院賜宴

文宗朝李訓充翰林侍講學士入院日賜宴宣法曲弟子二十人入院奏法曲以寵之

### 罷職復召

文宗朝鄭覃充翰林侍讀學士覃於經學稽古守正帝尤重之及李宗閔輔政以覃為工部尚書罷侍講學士文宗好經義心頗思之復召為侍講學士

### 遜謝無功

崔郾姿儀秀偉人望而慕之敬宗即位拜翰林侍讀學士旋進中書舍人郾曰陛下使侍講歷年半歲不一問經義臣無功不



足副厚恩帝慚曰朕少間當請益本傳

旋閱備問

宋夏竦之子安期除侍讀學士經術不甚深而登進經筵日旋閱經史以備顧問

在朝清介

宋申錫寶歷二年轉禮部員外郎尋充侍讀學士申錫在朝清謹介潔不侈黨與當長慶寶曆之間時風囂薄朋比大

申錫初用時論以為改觀本傳

履行純謹

皇祐中翰林侍讀學士給事中郭勸表乞致仕帝以勸履行謹立身清約特降詔不允示優恩也會要

記問博學

仁宗詔翰林侍讀學士張錫講書禁中敷暢經旨議論該洽嗟賞之錫鬢髮皓然上曰卿老矣記問不衰乃以飛白書地字賜之因訪以治道錫曰節慾者治身之本也謹刑賞之本也時貴妃被幸故以此諷之上改容曰卿言甚嘉朕卿晚矣

敷引時事

刑昺傳昺字叔明真宗始置翰林侍讀學士首以命昺即於坐令講左氏春秋講孝經禮記論語書易詩據傳疏敷引之及時事真宗甚嘉獎之

著寫草十卷



唐王起長於博洽文宗時爲翰林學士起侍講時有僻字疑事  
令中使口宣卽以榜子對

上金華五箴

馮元明道五年爲翰林學士侍講上金華五箴詔書寵之

錄帝範等篇

宋綬字公垂爲翰林學士兼侍讀遂錄唐謝偃惟皇戒德武孝  
經論語節要唐太宗所撰帝範開元臣僚所獻政典君臣正理  
論上之

事略

賜絲二百疋

崔郾爲侍講學士與同列高重抄撮六經嘉言要道區分事類  
八十卷名曰諸經纂要與人土易於省覽上嘉之賜絲二百疋

賜錢五十萬

至和元年賜翰林學士楊安國錢五十萬仍聽大寒暑每入謁  
時安國言衰憊不任侍經席願乞骸骨以歸故賜及之

新編古今事文類聚新集卷之二十

終



